

## Kálag e'só eche Jɔnɛ Ndibned n kálag

Metɔte méde mébe míme mékǎá bon Jɔnɛ átɛl kálag e e'só. Atɔte dé e'só ádíi áwéd bad ábe áténlé chó nlém á abum ábel bébê mod nhóg ne Dyõb ne awe Mwǎn, Yesu Krístæ.

Metɔte míme mélónténé mébe médii, Jɔnɛ alánge bad ábe áténlé chó aá bétêd pónde ne ayáge dé metóm ayále débēbēd abé áde bédíi mod nhóg ne Dyõb ne Yesu Krístæ. Adê ayáge dé metóm áhóbe nén bán ebébtéd épag ne abé áde moonyon ábágkē á nkõnsé tē, bán né-ɔó, Yesuɛ, Mwǎn a Dyõb eéhele'áá-se ákõn moonyon abé. Abê bemeléede bé metóm béhóbe nén bán nzé mod ákũd e'sooson, atánjéné nēe ábáá mekan mé nkõnsé á yǎl. Báyágte ámpē nén bán e'sooson béewóó'é dyamdyam ábel ne abé á bwám ne áwón edánge ne nhóg ne aníníi.

Alúmed aá adê ayáge déetángené Jɔnɛ alúmté á kálag tē wén aá Yesuɛ ankõn moonyon abé akoó-'é alúmed áte nén aá bad ábe bédúbpe Yesuɛ bon bédān-'é Dyõb bétánjéné nēe bédáá nhóg ne aníníi.

### **Nkabtéd n kálag**

Ndibned 1.1-4

E'nyínen bé ekíde ne ehíntén 1.5-2.29

Bǎn bé Dyõb ne bǎn bé Satanɛ 3.1-24

Mbále ne awusé 4.1-6

Chõm éche edánge édíi 4.7-21

Adúbe áde átómé mekan mésyāal áte 5.1-21

### *Eyale é alongé*

<sup>1</sup> Ntenle' nyé tângene ane awě adé Eyale é Dyõb éche épεene' alongé. Abédé se á mbooted, sênwóg mam tângene mó, sennyínén mó mǐd, sêmbán mó dǐd áyāl, sêmbán-ne mó ekaá á yǎl. <sup>2</sup> Mó awě apεene' alongé antǐm moonyon awě bényinnéé dǐd, dennýn-ne mó. Sêbǐde' mó mbón, sélāngē-'ε nyé mam tângene mó awě abage' alongé áde déemaá', mó awě ambé ne Titéε, bon átǐm abyéén átǐnté echêd. <sup>3</sup> Chõm éche sényiné, éche séwógé-'ε, chõ sélāngéé nyé, ábel bon nyébê nlatén ne sé. Mmēd nlatén-ne nǐdǐ nlatén nǐme déwóó ne Titéε ne awe Mwǎn Yesu Krǐstæ. <sup>4</sup> Sêtelé enén kálag, ábel bon nǐmēd menyǐnge mélôn mbon.

### *Alongé á bad ábe bédé á e'nyínen bé ekide*

<sup>5</sup> Bõb-põó, póle echě séwógé á nsal wéε Yesu Krǐstæ bon sélāngē-'ε nyé edǐi nén, Dyõb ádǐi e'nyínen bé ekide. Atón dé mbéb ké ahóg déesaá mó á yǎl. <sup>6</sup> Nzé dehóbé bán dedé nlatén ne mó áde alongé ádēd ádǐi ádǐi alongé dé ehǐntén, né dekale metóm né nǐme syánē mbeltéd-te méēhǐdēē mbále. <sup>7</sup> Bon nzé dewóó alongé dé e'nyínen bé ekide ngáne Mwěn-ne ámpē áwóó, né syánē dēēbē nlatén ne nhóg ne aníní, mekií nǐme Yesuε awe Mwǎn, mó-'ε méwobé nǐmesyánē mbéb nǐsyāǎl.

<sup>8</sup> Nzé dehóbé bán deewóó'ε atón dé mbéb ké ahóg á yǎl, né dedoge' échēd yǎl, né mbále-'ε eesaá syánē áte. <sup>9</sup> Nzé depanle' nǐmesyánē mbéb áte, né ábēl ngáne áhóbé, ábēl-le chõ nyaa echě etāngéné. Alagsén syánē mbéb, áwōbē-'ε nǐmesyánē mbéb nǐsyāǎl. <sup>10</sup> Nzé dehóbé bán deēbeléé mbéb, né

dehóbe' bán Dyöb ádíi nkal a metóm, né eyale é Dyöb éesaá-'aá syánē áte.

## 2

### *Jone ad Krístæ mó adé awesyánē Nwõngene*

<sup>1</sup> Nyé ábe nyêdé nêngáne ábêm bán, ntenle nyé enén kálag, ábel boŋ nyéebēlē mbéb. Boŋ nzé mod abelé mbéb, syánē dewóó mod awě abele' mekan míme métáŋgéné, Yesu Krístæ. Mó achâŋge' syánē Titée. <sup>2</sup> Krístæ mwěŋ-éé ambé nêngáne nde echě Dyöb dēmbenlédte ákade syánē áyāl e mbéb míme dēmbenlé. Ambel nê ábel dékud alagsen. Saá-kaá mbéb mímesyánē mēmpen, boŋ mbéb míme bad bé nkõŋsé bésyāāl.

<sup>3</sup> Nzé dehíde' mbéndé é Dyöb né édé mbále bán debíí mó. <sup>4</sup> Kénzée awě ahóbé aá móbīí mó, boŋ eehíde' éche mbéndé, né ene ndín e mod adíi nkal a metóm, né mbále ké póg eesaá-'áa mó áte. <sup>5</sup> Boŋ kénzée awě abele' ngáne eyale é Dyöb éhóbéé, edaŋge éche ene ndín e mod ádáá Dyöb élóne' mbon. Nén dáo abele' boŋ debíí ne mbále bán dedé ne Dyöb. <sup>6</sup> Kénzée awě ahóbé aá módē ne Dyöb, ádē alongé átáŋgéné abé nêngáne alongé áde Yesu Krístæ.

### *Mbéndé e ekóólé*

<sup>7</sup> A-baányan bé edaŋge, enén mbéndé echě íntenléé nyé eesaá mbéndé e ekóólé, edíi mbéndé e nchun echě nyénwõngē se á mbooted. Enén mbéndé e nchun edíi nkalan mí bwám míme nyémáá awóg. <sup>8</sup> Boŋ kénê, mbéndé e ekóólé cháo íntenléé nyé bōōb, mbále echě edé-'e á mbéndé-te wê, enyínnédé á alongé áde Krístæ, enyínnéd-te

á alongé ádēn, áyāle nēn ehintēn ébóótédé amaa, e'nyínēn bé ekíde é' mbále é'máá abooted dé apen.

<sup>9</sup> Kénzée awě ahóbé aá módē á e'nyínēn bé ekíde boŋ ákōō mwānyan, ene ndín e mod adii adé á ehintēn-tē. <sup>10</sup> Kénzée awě adə́ mwānyan adé á e'nyínēn bé ekíde-tē. Né-ɔ́, ene ndín e mod éēbēlēē dyamdyam áde ábēlte' bad bēmpēe mbéb. <sup>11</sup> Boŋ kénzée awě akɔ́ mwānyan, awóó alongé dé ehintēn. Ene ndín e mod akag á ehintēn-tē eebyée-'aá wēē ákagké áyāle ehintēn ébélé adé nēē mod awě akwedé ndím.

<sup>12</sup> Nyé ábe nyédé nēngáne ábēm bān, ntenle nyé áyāle Dyōb álágséné nyé mbéb á dīn áde Yesu Krístə. <sup>13</sup> A-besān, ntenle nyé áyāle nyébíí ane awě adé se á mbooted. A-kódébad, ntenle nyé, áyāle nyétómé ane awě adé ebébtéd áte.

<sup>14</sup> A-bānbān, ntenle' nyé áyāle nyébíí Titée. A-besān, ntenle nyé, áyāle nyébíí ane awě adé se á mbooted. A-kódébad ntenle nyé, áyāle nyēwúú áte, eyale é Dyōb édé nyé áte nyétómé-'e ane awe adé ebébtéd áte.

<sup>15</sup> Nyéēdāā' nkōŋsé ké'ε bwēm ábe é'dé áwēd-te. Nzé mod adə́ nkōŋsé, né eédə́'ε Titée. <sup>16</sup> Bwēm é'syāāl ábe é'dé á nkōŋsé te, nédē bwēm ábe moonyon a ekob áwóó'ε esíí áte, bwēm ábe mīd médə́'ε anyín ne bwēm ábe bad békumnēé ekáá á tāl, bēēhúu'ε ne Titée, é'díi bwēm bé nkōŋsé. <sup>17</sup> Nkōŋsé ne ábe bwēm é'syāāl ábe baányon bēwóó'ε esíí áte áyāl echáb, nítóme tómén, boŋ mod awě abele' ngáne Dyōb áhēdēé, abág ne Dyōb á ngíndé ne á ngíndé.

*Jõne ad nyétêd pòndé  
ne bad ábe bétâᅇgan Krístæ*

<sup>18</sup> A-bãnbãn, asóg ákwógé apɛ. Bénlāā nyé bán Mod a Ekɔyí awě Krístæ äpě, bɔɔb-pe bad bé ekɔyí híin ábe Krístæ bé máá apɛ. Né-ɔó, debíi bán asóg ákwógé apɛ. <sup>19</sup> Abê bad bénkênkoᅇgé bad abé ábe bédé nímesyánē nlatén, né-'áá dênkǎᅇ boᅇ bétēdē syánē. Nzé bém̄bē bad ábe bédé áwesyánē nlatén, né bém̄bē bébé ne syánē, boᅇ bēnchené syánē ábel boᅇ ényínned ne mbále nén bán bénkênkoᅇgé abé ne syánē. <sup>20</sup> Boᅇ ne nyé, Ane-awě-Béwógté abagé nyé Edæádəᅇ éche Esáá. Né-ɔó, nyé moosyáál nyébíi mbále. <sup>21</sup> Meétēnlēē nyé enén kálag áyāle nyéebíi' é mbále, boᅇ ntenle' nyé ch́ó áyāle nyébíi mbále, nyébíi'-é nén bán metóm ké mehóg méēbídēē á mbále-tê. <sup>22</sup> Nzéé-'ō adé nkal a metóm? Nkal a metóm adíi kénzée awě ahóbé áá, Yesue eésáá Ane awě Dyöb Áwógté. Ene ndín e mod ch́ó edé Mod a Ekɔyí awe Krístæ, abáa' Titée á yǎl, ábāā-'é Mwǎn. <sup>23</sup> Mod éēhēlēē-se abáᅇ Mwǎn a Dyöb á yǎl se abé ne Titée. Kénzée awe akobé Mwǎn a Dyöb, akobé kááᅇne Titée. <sup>24</sup> Nyényín nén bán nkalaᅇ níme nyéwógé se á mbooted rídé nyé áte. Nzé nkalaᅇ níme nyéwógé, rídii rídé nyé áte, né nyémpē nyéēbē ne Mwǎn a Dyöb nyébé-'é ne Titée. <sup>25</sup> Ch́óm éche Krístæ áhóbé áá ḿóᅇbē syánē édii alonᅇgé áde déemaá'.

<sup>26</sup> Ntenle nyé nímén mam áyāle bad bédé ábe béhede nyé adog. <sup>27</sup> Boᅇ ne nyé, Krístæ abagé nyé Edæádəᅇ éche Esáá. Abé áde échē Edæádəᅇ édii nyé áte, nyéetógnenēé modmod áyáged nyé. Echē edæádəᅇ éyágte nyé mam mésyāāl, mam níme éyágte-'áa nyé médé mbále, méesaá metóm. Né-ɔó,

nyébê nyébê ne Krīstæ ngáne Edæádəŋ éche Esáá éyágté nyé.

<sup>28</sup> Bəəb-pəó, a-bănbān, nyébê mod nhóg ne mó, âbel boŋ epun éche áπεέ, nlém íwúu syánē á abum, deewógé-’ε e’sôn âtyéem mó á’sō. <sup>29</sup> Nyébíí bán Krīstæ abele mekan míme métəŋgéné á’sō é’ Dyöb, né-əó, nyébíí bán kénzée awě abele’ mekan míme métəŋgéné, adíi mwän a Dyöb.

### 3

#### *Jone ahóbé ngáne alongé áde bán bé Dyöb átəŋgéné abé*

<sup>1</sup> Nyényín ndín e edəŋge echē Titée ádáá syánē. Echē edəŋge échábé ámín káəŋ béchəge syánē bán bán bé Dyöb, bən-naá dékóó abé. Nzəm echē ekáə boŋ bad bé nköŋsé béebíi syánē edíi áyāle béēsēbπεέ Titée abíi. <sup>2</sup> A-baányəŋ bé edəŋge, syánē dedíi bán bé Dyöb bəəb. Eēbyēēnēē hwām pən chöm-ée syánē débēē. Boŋ debíí bán pónδέ echē Krīstæ áπεέ, syánē déēbē nēŋgáne mó, áyāle nén deényín mó ngáne adíi. <sup>3</sup> Kénzée awě asumé nlém wée Krīstæ átəŋgéné née asánté eche yäl ngáne Krīstæ mwən ámpē ásáá.

<sup>4</sup> Kénzée awě abelé mbéb, akwedé nkáá áyāle abóó mbéndé e Dyöb. Mbéb ídíi abóó á mbéndé e Dyöb. <sup>5</sup> Nyébíí bán epε éche Krīstæ ámpεé á nköŋsé ébedée ámad mbéb. Krīstæ mwən-ne eewóó’é mbéb ké nhóg á yäl. <sup>6</sup> Kénzée awě adé ne Krīstæ éēbēlēē mbéb. Kénzée awě abele mbéb, eenyínée Krīstæ eebíi-’áa mó.

<sup>7</sup> A-bănbăn, nyéēmwāg se mod ádog nyé. Kénzée awě abele mekan míme métəŋgéné adíi

mod awě abele mekan níme métəngéné á'sō é' Dyöb, ngáne Krístəə ábeléé mekan níme métəngéné. <sup>8</sup> Kénzée awě abele mbéb, adii mwän awě Devəle áyāle Devəle ambootéd mbéb abel sé á mbooted. Nzəm echě enkəñ bonj Mwän a Dyöb ápē á nköñsé, ebédée ábébed nsón níme Devəle ábélé. <sup>9</sup> Kénzée awě adé mwän a Dyöb, éēbēlēē mbéb, áyāle abé á Dyöb adé mó áte, éēhēlēē'-ε-se ábelé mbéb áyāle Dyöb dōó adé mó Sáá. <sup>10</sup> Chöm éche ékoo' syánē alúmed bad ábe bédé bän bé Dyöb ne ábe bédé bän bé Satan édii nén bän, bad ábe béebelé' mam níme métəngéné ne bad ábe béedəə baányəñ bé Krísto, béesaá bän bé Dyöb.

### *Jone ad bad bédəñ nhóg ne aninií*

<sup>11</sup> Nkalanj mí bwām níme nyénwōgkē se á mbooted mbédée nén bän, dédəñ nhóg ne aninií. <sup>12</sup> Deebág née Keene. Keene abédée mod awě Satanε, anwúú'-ε mwānyəñ. Cheé ênkəñ bonj Keene awúú mwānyəñ? Anwúú mó áyāle mekan níme mwən ábélé'áá mébédé mam mé mbéb bonj níme mwānyəñ méntəngēñ á'sō é' Dyöb. <sup>13</sup> Né-ōó, a-baányəñ, nyéebág menyáké ngáne bad bé nköñsé békóó nyé. <sup>14</sup> Dedəó bänned bé Krísto bémpēe, nē dōó ábélé bonj debii bän dehıdté áse e ngine e kwéed dekudé alonjé áde déemaá'. Kénzée awě eédəə bänned bé Krísto bémpēe, alyagé adé áse e ngine e kwéed. <sup>15</sup> Kénzée awě akóó mwānyəñ a Krísto, adii mod a ewúen, nyébii'-ε nén bän alonjé áde déemaá' déesaá mod a ewúen ké nhóg áte. <sup>16</sup> Krístəə ambě adē alonjé á nló nímēd. Nén dōó ábélé bonj debii chöm éche edəñge edii. Né-ōó, syánē ámpē detəngéné née débágé ádēd alonjé á

nló míme bãnned bé Krısto bémpēe. <sup>17</sup> Nzé mod adé awě adé nhon, bonj anyiné mwānyan awě atóge' bonj eewóo nlém mí bwâm âwóngeɲ mó, chán áhɛlesɛ ahób aá módəə Dyöb? <sup>18</sup> A-bãnbãn, edənge éche déwánléné nhóg ne aníníí, éetəngeɲéé abé dásō á nsəl-tê ne á póle bonj étəngéné abé á mbeltéd ne á mbále-tê.

*Jone ahóbé chõm éche ébele'  
bonj deewógé mbwóg á'sō é' Dyöb*

<sup>19</sup> Nzé delúmté nhóg ne aníníí edənge, né debíí bán dedé bad bé mbále ne debíí-’ε bán nlém méwūū syánē á abum á'sō e' Dyöb. <sup>20</sup> Póndé ké ehéé echě nímēd mewēmtɛn mélánge syánē bán debelé mbéb, debíí bán Dyöb ábíí mam mésyāēl tómaa ngáne syánē débíí. <sup>21</sup> A-baányan bé edənge, nzé mímesyánē mewēmtɛn méēlānge syánē bán dedíí bebel bé mbéb, deewógéé mbwóg ké nhóg nzé dekānne' á'sō é' Dyöb. <sup>22</sup> Dekude kéchéé éche désédté mó áyāle dehíde' éche mbéndé débélé-’ε mam míme méwógte mó menyinje. <sup>23</sup> Mbéndé echě ábágé, edíí nén, dédúbe á đín áde awe Mwān Yesu Krıstəə, dédəɲ-’ε nhóg ne aníníí. Melem-lem mé mbéndé móo Krıstəə mómpē āmbéé syánē. <sup>24</sup> Kénzéé-’ε awě ahíde' mbéndé é Dyöb, abág mod nhóg ne Dyöb, Dyöb-pe ábē mod nhóg ne mó. Nén dś-'aá débéléé bonj debíí bán Dyöb ádé ne syánē. Debíí áned áyāle Édəəđəɲ éche ábágé syánē.

## 4

*Jone ahóbé aá bad bétéd  
póndé ne e'dəəđəɲ bé metóm*

<sup>1</sup> A-baányan bé edənge, nyéedúbpe bad bésyāā́l ábe behóbe' bán béwóó Edáádəŋ é Dyöb. Bon pen, nyékəg bó ábíi nzé edáádəŋ éche édé bó áte éhúú ne Dyöb. Nyékəg bó áyāle ekud é bekal bé'dáádəŋ bé metóm bépédé á nköŋsé-te. <sup>2</sup> Chöm éche wébeŋlé bon ebíi mod awě Edáádəŋ é Dyöb édíi áte édíi; kénzéé awě ahóbé aá Yesu Krístə́ apedé á nköŋsé néε moonyon, né ane mod awóó Edáádəŋ é Dyöb. <sup>3</sup> Bon kénzéé awě ahóbé aá Yesu eépedeé á nköŋsé néε moonyon, eewóó' é Edáádəŋ é Dyöb áte. Edáádəŋ éche ene ndín e mod áwóó áte édíi edáádəŋ éche ehúú ne Mod a Ebébtéd. Nyēnwóg bán échén edáádəŋ épě, bəəb-pe é máá ape á nköŋsé-te.

<sup>4</sup> A-bānbān nyédíi bad bé Dyöb, nyétómé-'ε ábē bekal bé'dáádəŋ bé metóm áte, áyāle Edáádəŋ éche édé nyé áte édé ngíne tómaa Satanε awě akamlan bad bé nköŋsé. <sup>5</sup> Abē bekal bé'dáádəŋ bé metóm bédíi bad bé nköŋsé, né-ɔ́, mekan míme behóbéé médíi mekan mé nköŋsé, bad bé nköŋsé-'ε béwóglan bó. <sup>6</sup> Syánē dedíi bad bé Dyöb. Kénzéé awě abíi Dyöb awóglan syánē, kénzéé-'ε awě eésē mod a Dyöb, eewóglanné syánē. Né-ɔ́, nén dɔ́ mod áhele abíi nhəŋlén áfíntē e Edáádəŋ é mbále ne edáádəŋ é metóm.

### *Jone ad Dyöb adás syánē*

<sup>7</sup> A-baányan bé edənge, dedəŋ nhóg ne aníníi áyāle nén edənge éhúú ne Dyöb. Kénzéé-'ε awě adáá mwānyan a Krísto adíi mwān a Dyöb, abíi-'ε Dyöb. <sup>8</sup> Kénzéé awě eédəə baányan bé Krísto, eebíi' é Dyöb, áyāle kéchéé éche Dyöb ábeleé é lúmté' edənge éche áwóŋné bad. <sup>9</sup> Dyöb álúmté syánē

edəŋge ne nén, alómé nímé mpəm ní Mwän á nkõŋsé-te ábel boŋ dékud alongé áde déemaá' mb-wiined ne mó. <sup>10</sup> Chõm éche édé edəŋge édii nén, saké bán syánē dedəá Dyõb, boŋ nén Dyõb ádáá syánē, anlóm-me awe Mwän ákəde syánē áyāl e mbéb níme débélé.

<sup>11</sup> A-baányəŋ bé edəŋge, ngáne édii bán Dyõb átómténé syánē adəŋ, syánē ámpē detəŋgéné dédəŋ nhóg ne aníníí. <sup>12</sup> Mod eényĩnēē Dyõb mbéd. Nzé dedəá nhóg ne aníníí, né Dyõb débē ne syánē, échē edəŋge-ε éche ádáá syánē élõn mbon.

<sup>13</sup> Nén dó-'aá débēl boŋ débíí bán syánē dedé ne Dyõb, Dyõb-pe áde ne syánē, áyāle abagé syánē échē Edəádəŋ. <sup>14</sup> Syánē denyíné, deləŋge-ε bad bémpēe nén bán Titée alómé awe Mwän ábé Nsoode a nkõŋsé. <sup>15</sup> Bad ábe béhóbe' bán Yesue adíí Mwän a Dyõb, Dyõb áde ne bó, bó-ε bédé ne Dyõb. <sup>16</sup> Né-ɔ́, syánē debíí, dedúbpe-ε edəŋge éche Dyõb ádáá syánē.

Kéchéé éche Dyõb ábeléé élúmte edəŋge éche áwóŋné bad, bad-te ábe edəŋge édii áte, bédé ne Dyõb. Dyõb-pe áde ne bó. <sup>17</sup> Edəŋge éche édé syánē áte, élóné mbon ne nén, nlém mēwū syánē áte á mbwe mé nkáásé, áyāle nén dedé mod nhóg ne Dyõb á nkõŋsé-te hén melemlen ngáne Krístə ámbēē ne mó. <sup>18</sup> Mod awē Dyõb ádáá eewógéé mbwóg. Edəŋge éche élóné mbon éne mbwóg nisyāāl. Abəŋ dé nkógsén dɔ́ əpεene mbwóg. Né-ɔ́, kénzēé awē mbwóg nídíí áte, edəŋge éelónéé mó mbon áte. <sup>19</sup> Delúmte' edəŋge áyāle Dyõb ásébpé syánē edəŋge alúmed. <sup>20</sup> Nzé mod ahóbé aá módəá Dyõb boŋ akɔ́ mwănyəŋ a Krístə, ane mod akale metóm, áyāle mod awē eédəə mwănyəŋ awē

ányínεέ, éēhēlēē-se ádāη Dyöb áde éēnyīnēē. <sup>21</sup> Né-  
 zó, enén mbéndé chóó bébágé syánē; kénzée awě  
 adəá Dyöb ádāη kááηne mwānyaη.

## 5

### *Jone ad bad abe bédúbpé Krístəə bétómé nkōηsé áte*

<sup>1</sup> Kénzée awě adúbpe aá Yesue mó adé Ane awě  
 Dyöb Awógté, adii mwān a Dyöb. Kénzée-’ε awě  
 adəá sáá-a-mwān adəá’ kááηne mwān. <sup>2</sup> Nyaa echě  
 débíε’ε bán dedəá bán bé Dyöb edii nén bán syánē  
 dedəá Dyöb, dekonje-’ε échē mbéndé. <sup>3</sup> Adāη  
 Dyöb adii áhíd éche mbéndé, éche mbéndé-’ε  
 éetōmtεnεé awúu áte syánē áhíd chó. <sup>4</sup> Kénzée awě  
 adé mwān a Dyöb atómé nkōηsé áte. Nzəm echě  
 atómé nkōηsé áte, edii nén, dedúbpe bán Yesue  
 mó adé Ane awě Dyöb Awógté. <sup>5</sup> Modmod ampée  
 eésaa awě atóme nkōηsé áte éetómεé mod awě  
 adúbpe aá Yesue adii Mwān a Dyöb.

### *Jone ahóbé bwēm é’láán abe é’bide Yesue mbón*

<sup>6</sup> Yesu Krístəə ampě á nkōηsé. Bëndusén mó ne  
 mendíb bon ámbíd e pónde echě áwédé á awög  
 nímē mekií mēnsyógé. Saké edusen é mendíb  
 chēmpen ēmbenléd ne mó, bon áde áwédé nímē  
 mekií mēnsyógé. Edəádāη éche Esáá chós élúmte  
 syánē aá nén adé mbále, áyāle Edəádāη éche Esáá  
 éekalée metóm. <sup>7</sup> Nyaa édé éláán ábii mbále  
 tāηgene Yesue. <sup>8</sup> Debíí mbále tāηgene Yesue áyāle  
 Edəádāη élangé syánē, bëndusén mó ne mendíb,  
 ansyög-ke nímē mekií áde áwédé. Echén nyaa  
 éláán ésyāēl élúmte syánē bán Yesue adii Mwān a  
 Dyöb. <sup>9</sup> Ngáne dedúbpe mekan nímē bad behóbeé,

kéchée éche Dyöb álângeé syánē étómténé etógnén abé tómaa mekan míme bad bélângeé syánē. Nén adé áyāle Dyöb dēn dōo álângeé syánē, tângeene awe Mwän. <sup>10</sup> Kénzée awē adúbpe Mwän a Dyöb, abíi nén aá mímén mekan mésyāal médé mbále. Boŋ kénzée awē eedúbpe Dyöb, édii nêngáne ahóbe' aá Dyöb ádii nkal a metóm, áyāle eedúbpeé mekan míme Dyöb áhóbé tângeene awe Mwän. <sup>11</sup> Chõm éche Dyöb álângeé syánē édii nén; abelé syánē dekudé alongé áde déemaá'. Adén alongé ádii alongé áde awe Mwän ábageé. <sup>12</sup> Kénzée awē adé nhóg ne Mwän a Dyöb akudé áde alongé, kénzée- 'ε awē eesē nhóg ne Mwän a Dyöb, eékudéé áde alongé.

*Déwõngen nhóg ne anítii  
ákud alongé áde déemaá'*

<sup>13</sup> Ntenle' nyé ábe nyédúbpe á dñn á Mwän a Dyöb, ábel boŋ nyébíi bán nyékudé alongé áde déemaá'. <sup>14</sup> Desumé nlém nén bán, kéchéé éche déhédné Dyöb ngáne ébõñnéde mó, abelé awóg syánē mekáne. <sup>15</sup> Ngáne débíi-'ε bán awóge' syánē áyāl e kéchéé éche déhédné mó, detângeéné abíi bán abage syánē kéchéé éche déhédné mó.

<sup>16</sup> Nzé mod anyíne mwãnyan abele mbéb míme méepiinéd mó kwéed, atângeéné akánnéd mó. Dyöb débě ane mod alongé. Bad ábe rihóbeé meé nyékánnéd bédii bad ábe mbéb mímāb méebeléé boŋ échāb edā́dāŋ éwé. Mbéb ídé míme míbele boŋ edā́dāŋ éwé. Nzé mod abelé ene ndín e mbéb meehóbéé meé nyékánnéd ane mod. <sup>17</sup> Mewusé mésyāal médii mbéb, boŋ donge dé mbéb áde áde déebelé boŋ edā́dāŋ éwé.

<sup>18</sup> Debíi nén bán kénzée awě adé mwăn a Dyõb eébeleē mbéb, áyāle Mwăn a Dyõb akənge mó, Ane awě adé Ebébtéd eéheleē-’ε-sε ábel mó mbéb. <sup>19</sup> Debíi bán dedíi bán bé Dyõb debíi-’ε nén bán Ane awě adé Ebébtéd akamlan bad bésyāal ábe béebíi Dyõb. <sup>20</sup> Debíi nén bán Mwăn a Dyõb apedé á nkõsé-te abagé-’ε syánē nsõηten ábíi Dyõb á mbále. Dedé-’ε mod nhóg ne mó áyāle dedé mod nhóg ne awe Mwăn, Yesu Krístæ. Mwēnpēnaá adé Dyõb, mwēn-naá abage bad alongé áde déemaá’. <sup>21</sup> A-bānbān, nyéewóó’ dyamdyam ábel ne myõb mé metóm.

**Mel̃ Mékōōlē**  
**New Testament in Akoose (CM:bss:Akoose)**

copyright © 2011 Wycliffe Bible Translators, Inc.

Language: Akoose

Translation by: Wycliffe Bible Translators, Inc.

Akoose

bss

Cameroon

**Copyright Information**

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Akoose

**© 2011, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

---

PDF generated using Haiola and XeLaTeX on 11 Nov 2022 from source files dated 29 Jan 2022

0143729f-907e-5098-b6ce-63b1629b8e48